



Rengma Reserve Forest
atsünger alirtem aninogo



Ben Stokes India den
Test 5buba masayatsü

VOL. XXII ISSUE NO. 286 (ADOK 286) DIMAPUR

YANGTEPNÜ (THURSDAY)

CHITENI (JULY) 31, 2025 ₹ 5.00

Mokokchung district nung ketdangsür temi meranga inyaktar

Dimapur, Chiteni/July 30 (TYO): Assam sorkari illegal immigrants aridokba ajanga item nisungtem Mokokchung district telungi aittsü akok ta nüburtem terata aser tetsübo nung aliba angur.

Iba dak sendakba nung Mokokchung district administration ajanga Administrative Officers, Police, Village Councils aser nüngdakba stakeholders ajunga dang saksalema alitsü aser Mokokchung district telungi illegal immigrants tem aitba aziüoktsü totuyuba agütsüogo, ta Deputy Commissioner, Mokokchung, Ajit Kumar Verma, IAS ajanga sangdong ka nung ashi.

Iba den Mokokchung district administration ajanga nüngdakba stakeholders den shisadokden

senden menogo aser tajungba nung mita tensa aziüoktsü atema Police, enforcement agencies aser civil society organisations den teka amteper inyaktar, ta ashi.

Anungji illegal immigrants tem Mokokchung district-i aittsü ama lazükra, tekeraba nung osang agütsütsü aser saksalema alitsü Mokokchung district administration ajanga Village Councils, ULBs, GBs, CSOs aser nüburtem dang ayongzüker.

Region nung tensa sunepa alitsü aser Mokokchung district nung nüburtem kumzüka ayutsü mechi iba mera ya agir. Anungji nisung kari danga illegal immigrant tem aniokba aser jenokdaksüba metetra, tapet ozüing kübok merenshitsü, ta DC Mokokchung ajangasa metetdaksü.

Nagaland GB Federation-i illegal immigrants tebilemstsü lemsatep

Dimapur, Chiteni/July 30 (TYO): Tesüiba anogo ishika tsüngta kidanger Assam state nungi illegal immigrants tem nungpoka aitba osang nung ajemdaker Nagaland GB Federation (NGBF) ajanga tebilemstsü lemsatepa liasü.

Iba ama nisungtem aitba ajanga loktiliba, rongsenketzüng aser yimtenren tsütsü Naga nunger dak kongshitsüba indang tebilemstsü NGBF ajanga lemsatepa liasü.

Federation ajanga GBs/village chiefs ajunga aser talisa Assam arütsülen alirtem dang saksalema alitsü, district ketdangsür, police aser border magistrates tem den amalitep akatsü ayongzüka liasü.

Tang amala mapang nung GBs temi tongtipang shilem agir,

kechiaser parnoki yimtsüng nung alirtem ajunga tenüing teta meteta lir, ta ashi.

"Asen Naga nunger sobaliba aser yimsü-yimbong wazüka ayur ka ama asen li, sobaliba, yimsü-yimbong aser asen nüburtem kumzüka ayutsü asen mapa lir. Anungji NGBF ajanga GBs ajunga dang law enforcing agencies den yaritepa pei yimtsüng nung mejangjaba nisungtem mesüra temulung melemettsüsa nisungtem senzüsempongba jangjatsü ajungshir," ta sangdong ajanga ashi.

NGBF-isa district administration, police, volunteers, kaketshir, CSOs aser nisung balalai state wazüka ayutsü asoshi meranga inyakba atema pelaba lemsatepa liasü.

Inyaksangshi masüba Cooperative Society tem agintsü

Dimapur, Chiteni/July 30 (TYO): Assistant Registrar of Cooperative Societies, Kohima office sangdong ka ajanga, district nung inyaksangshi masüba Cooperative Society tem agintsü, ta metetdaksüogo. Nagaland Cooperative Societies Act, 2017 kübok Section 92(2), Sections 82 aser 83 dak ajemdaker iba jenjang ya agitsü, ta kasa sangdong ajanga metetdaksü.

Department of Cooperation-i inyaksangshi masüba Cooperative Society tem agintsü atema inyakba nung shilem ka ama item Society tem indang list ka renemogo aser August 1 nü

nungi Office indang notice board nung maloka toktsütsü. Kasa mapang nung ken o dak sendaka aliba society tem nema züngoksema aliba post ajanga osang agütsüogo.

List nung züngoksema aliba society temi parnok inyaksangshi asüngsashitsü atema temepshiba ka Assistant Registrar office nem August 31, 2025 nü tashi nungbo agütsütsü metetdaksüogo. Atakzüka aliba anogo tashi nung telangzüba magütsüra item society tem agintsü atema Registrar of Cooperative Societies, Nagaland dangi abentsü.

Nagaland Chief Secretary inyaktsü Sentianger Imchen, IAS shimer

Dimapur, Chiteni/July 30 (TYO): Additional Chief Secretary & Finance Commissioner, Nagaland, Sentianger Imchen, IAS ya nübur tenzüka wadang nung Nagaland indang Chief Secretary inyaktsü shimogo.

Sentianger Imchen, IAS Additional Chief Secretary &

Finance Commissioner, Nagaland ya August 1, 2025 nü nungi tenzüka Chief Secretary, Nagaland inyaktsü shimba Nagaland Angh-i metetdaksür, ta sangdong ka ajanga ashi.

Pai Chief Secretary Dr. J Alam, IAS melentsü, shiba July 31, 2025 nü superannuation nung mapa nungi anisüngzüker angur, ta

sangdong ajangasa ashi.

Department of Personnel and Administrative Reforms (Personnel 'A' Branch) ajanga sangdong ka agütsüba nung, Sentianger Imchen ya Nagaland cadre 1991 batch IAS officer ka lir aser tang Additional Chief Secretary aser Finance Commissioner teinyakdak lir.

June ita Nagaland nung GST revenue shilem 104 liasü

Dimapur, Chiteni/July 30 (TYO): Department of Taxes, Nagaland alizüing ka tongtetba July 26, 2025 nü Office of the Commissioner of Taxes, Dimapur nung benjonga liasü, kong inyakyim nung temelenshi aliba ajanga GST revenue kanga agi timba akum.

Küm ka nungi küm ka tsüngta medemdangba nung April ita shilem 43 agi timba liasü, may nung shilem 44 aser June 2025 nung shilem 104 agi timba liasü. Financial Year 2025-26 indang first quarter nung petroleum revenue nunga shilem 31 agi timba liasü.

Item tajangzüker ya ki o jen aser yangji aliba osettsüset tajungba akumba, skill development inyakyim, yimya tajungtiba amshiba aser enforcement mechanisms tajungba kuma melenshiba ajanga lir, ta department-i ashi.

Field officers aser Directorate ajanga jeret-pereta inyakba yangi jangja-jangja sayur.

Iba inyakyim tali yarisemtsü asoshi Sentianger Imchen, IAS, Additional Chief

Secretary and Finance Commissioner, Nagaland ajanga mobile squads aser enforcement Boloros densema gari tasen mezü semzüksü. Iba yagi senzüsempongba nung yaritsü aser state tesem ajungalen outreach sentongtem tajungba akumtsü.

Government of Nagaland-i department inyakyim nung nüngdakbatem nung yariba asoshi pelaba Abhinav Shivam, IAS, Commissioner of State Taxes ajanga lemsatepa liasü.

"Item gari ya kangasa nüngdaka liasü. Iba ya ajanga asenoki sentong yanglua field operations tajungba nung inyaktettsü," ta pai ashi.

Tax officers temi anibelem mesasai inyakba aser shishilembar tem ozüing sülen anidaker tali akumba atema Shivam-i tenüngsang agütsü.

Pai tax indang osang tejangja agütsütsü nüngdakba ashi saka

invoice taila yangluba, ITC fraud aser osang shidak magütsüba tekumdangtsü shia liasü.

Pai shishilembar tem dang item tebilemstsü bentettsü aser tang temelenshi mapa inyakba nung yariteptsü ayongzüka liasü.

"Tax tali bendenba ajanga GST inyakyim melenshiba nung Nagaland lirumedema aoba kuli sayur. Asen ketdangsürtem linük nung dangar den sako lir," ta Shivam-i ashi.

"Tax base tashi taitba akumba ya state senotsü indokba tali akumba kisüing masü, iba yagi national resource allocation nung Nagaland shilem tali kumdaktsür. Tax department nung sen indokba nungi tali meyipa angur," ta paisa ashi.

Commissioner-i nüburtem aser taxpayers tem dang tax optimisation ya nübur indang movement ka kumdaktsütsü ajungshi aser Nagaland tashi taitba akumtsü aser pei peria alitsü asoshi kangasa nüngdakba maparen ka lir, ta ashi.

Russia nung menoknok tesashi anak; Tsunami Japan, Hawaii aser US atong

Tokyo, Chiteni/July 30 (Agencies): Russia indang Far East nung Bodhbarnep menoknok tesashi anoka tsunami tzüsem Japan, Hawaii aser US West Coast tonga ao. Nisung kar tera yiru aser tang tasü teraksa tulu agütsübabo mali.

Menoknok 8.8 magnitude anokba ya ghonda aika alitsü ta ketdangsür temi tekumdangtsü metetdaksü aser mezüingbo tzüsem aotsüba lenmang nung aliba nisung million aika tzükum nungi ainshitsü mesüra tenemleni atutsü shia liasü.

Bodhbarnü mapang tatsüka lir Japan, Hawaii aser Russia nung kongshia aliba tesemtem nung tsunami warning ya agien mesüra ajemtsü. Ajisüaka Chile nungbo Pacific tzüyimum nung iba tekumdangtsü ya tematiba jenjang nung yutsü aser nisung noklang aika pei talidak nungi ainshidaktsü.

Russia indang Kamchatka peninsula nung menoknok anokli

yangji alirtem tekong bushia ajen, kechiaser rongnendak tesemtem tzü agi mubang aser nisung kar kidang nungi arsanga jena aoba mapang yirua liasü.

Japan nung Pacific tzüyimum anasa aliba nisung kar evacuation centers nung adenshi, kar tenem kolak aser kilem kolaki atu, kong 2011 küm menoknok anoka tsunami adokba ajanga nuclear lendong tulu ajurua liasü.

US West Coast timba nung aser Canada indang British Columbia nunga tsunami advisories agüja liasü.

2011 küm March ita Japan northeast tsütsü menoknok 9.0 magnitude anoka tsunami tulu adoka nuclear power plant raksatsüba sülenbo tanü anokba menoknok ya tesashitiba amai ajiteter. Ajisüaka Bodhbarnü Japan indang nuclear plants nung inyakyim balala nung tetsükdaktsü ajuruba meliasü.

Anepdang 11:24 ako nung menoknok 8.8 magnitude yagi

Kamchatka nung kilometres 21 tarok lur kongshi, ta U.S. Geological Survey ajanga ashir. Iba menoknok tiyongtsü ya Kamchatka indang regional capital Petropavlovsk-Kamchatsky nungi kilometres 120 shi pilar liasü.

Iba sülen aftershock aika liasü aser karbo 6.9 magnitude tashi liasü. Tsunami tzüsem ya Kamchatka tzükum nung tesem kar nungbo meters 10 nungi 15 (feet 30 nungi 50) tashi asütsü ta Russia indang Oceanology Institute ajanga ashi, saka peninsula nung nisung aliba anasa aser Kurils asetkong nung tzüsem talangtiba ya meters 6 (feet 20) dang tajemba liasü.

Philippines, Mexico aser New Zealand nung ketdangsür temi nüburtem dang tzüsem repranga alitsü tekumdangtsü ashi. Fiji, Samoa, Tonga, Federated States of Micronesia aser Solomon Islands nunga nüburtem dang tzükum nungi pila alitsü ashi.

CwSN atema camp ka ayongzüka agiogo

Dimapur, Chiteni/July 30 (TYO): 5buba National Education Policy (NEP) 2020 nüngdem nung Nagaland Education Mission Society, Samagra Shiksha-i, Children with Special Needs (CwSN) atema Mega Identification & Assessment Camp ka ayongzüka katsüogo.

Iba sentong ya National Health Mission, Department of Health and Family Welfare kübok Rashtriya Bal Swasthya Karyakram (RBSK) den longjemer Kohima nung July 29 nü agia liasü. Iba sentong ajanga inclusive education ajungketba nung tongtimbang jenjangka agiba sayur.

Camp lapokba sentong ya Directorate of School Education, Kohima nung agi, kong Kohima district kübok 5 EBRC Blocks nungi teyrai balaka nüngdaka aliba tanur 82-i shilem agia liasü. Iba inyakyim ya mata mabensaba tanurtem jangja-a parnok nem kakat shisatsü bushiba nung tapet teyari agütsütsü aser parnok tangutsü tim teyari balala agütsütsü nükjidong nung benokogo.

Iba sentong nung Advisor, School Education & SCERT, Government of Nagaland, Dr. Kekhrielhoulie Yhome alakteta

jaoker liasü. Sentong nung o jembiba mapang Dr. Yhome-i, NEP 2020 nükla den peta tangar dang nungi teyari talila nüngdaka aliba tanurtem densema tanur ajak nem kakat shisatsü kasa aser tajung agütsütsü atema sorkar bendanga agütsür aliba lemsatepa liasü.

Sentong nungsa Additional Secretary, School Education & SCERT, Vikhweno Chale (NCS)-i, CwSN tema takaratiba nung jangjateta parnok nem kakat shisatsü tapet agütsütsü koda tongtimbang iba indang lemsatepa liasü.

Sentong nung District Education Officer, Kohima, Emilo Patton-i tepela o jembiba. Iba sentong ya Deputy Mission Director, Samagra Shiksha, Kelhikha Kenye lenisüba nung agia liasü. Commissioner & Secretary, School Education, Kevileno Angami aser sister department ajak nungi HoD temi sentong nung shilem agia liasü.

Camp ya Naga Hospital Authority Kohima (NHAK) nung ayongzüka agi aser Department of Health & Family Welfare, Nagaland kübok doctor 11 aser RBSK züngsem 9 agi kümtetba team kati medical assessment agia liasü. Tanurtem ya disabilities

balala atema screen asü kong tenük agi manugtem, tenarong agi mangashirtem, Locomotor Disabilities, Dental and ENT Issues, Intellectual & Developmental Disabilities densema liasü.

Camp nung service balala agütsüba nung shilem ka ama tenarong agi mangashiba tanurtem nem hearing aids inoktsü. Iba den bendenloksema temsüa aliba tanurtem nem Medical Board-i disability certificates agütsü aser iba ajanga parnok sorkar scheme, teyari aser education dak sendakba nung teyari balala agütsü atema temsüa kümdaktsüogo.

Iba camp ya Samagra Shiksha kübok inclusive education benokba tashi itshidaktsütsü aser tangar memenep aliba tanurtem temeden aser meraket ajungkettsü nükjidong nung ayongzüka agiogo. Iba ajanga ano tsürapur, tesayur aser nüburtem nem tanurtem dak timtem aliba takaratiba nung puteta teyari agütsütsü koda tongtimbang iba indang tangazükba agütsüogo. Iba camp ya Akhil Bharatiya Shiksha Samagam kübok district ajak nung ayongzüka agütsü sentong lir.

Mokokchung nunga KFC store lapokogo

ANEPDANG 10:00, NUNGI AONUNG 9:00, AKO TASHI LAPOKTSÜ



Mokokchung, 30th July (TYO): Tanur tain ajaki Mokokchung yimti nunga KFC lapoktsü ta osang angashia yongyaseta aliba mapang ama, tanü 30th July, 2025 anogo asangsang küma Sangtemla Ward, Mokokchung nung Mokokchung Deputy Commissioner, Ajit Kumar Verma, IAS-i meraketa lapoktsüogo. KFC ya Mokokchung Post Office anasa I.M Road nung lir. Tanep iba KFC store ya Kümlong Baptist Arogo, Associate Pastor, Dr. R. Zülü Jamir-i sarasadema meshitettsü.

Tanü Mokokchung nung lapokba ya zünga Nagaland nung KFC store 10 buba asütsü aser northeast nung store 58 buba lir. Tang tashi Nagaland nung KFC store ya Dimapur, Kohima, Chümoukedima yimtittem nung lapoka lir aser tanü Mokokchung nung lapoker. Ano meilongi tanga district-tem nunga lapokyonga aotsü sentong lir, ta iba osangbeneri Marketing Manager, M.D Sagir aser KFC Trainer, Dipayan Dutta na den jembidang metetdaksü. KFC ya alima ajaki sabuba chiyungsü ka, aji oda, alima tesem ajak nung

chiyung tajung tongtsütsübaji par nükjidong lir, ta tenadisa ashi.

Mokokchung nung tawa to 'Vishal Mega Mart' lapokogo aser tanü KFC lapokba ya jangratemtsüka lir. Iba yagi Mokokchung tobur jungdaktsüba den jila ainba kuli sayur. Rongsenkar shirnoki Mokokchung nung rongsen paoktsür (invest asür) parnok dang onsara pelar. Mokokchung ya Dimapur aser Kohima amato market tulubo masütsüa akok saka ibai tuluba rena aotsü ngujem lir, ta iba osangbeneri Mokokchung nung senso tejangja ka den jembidang pai metetdaksü. Ano Mokokchung nung nisung kari "FirstCry Store" lapoktsü maparen inyakdar ta osang kar ajanga angazüker.

Mokokchung KFC nung ya khen nung nisung 40 shi menteter aser ibai anepdang 10:00 ako nungi aonung 9:00 ako tashi lapoktsü. Anungji, mapa menua inyakertema pei mapa temer külena semdangtetba. Memenui KFC-i parnok indang tsüngdongbener arutsüba (delivery service) mapa tenzüksü, ta KFC ketdangsürtemisa metetdaksü.

Advisor Kropol-i AIFFSO office semzüksüogo



Kohima, Chiteni/Jul 30 (TYO): Advisor for Prisons, Printing & Stationery, Er Kropol Vitsu-i tanü Industry Centre Kohima nung All India Freedom Fighters Successor's Organisation (AIFFSO) Nagaland office semzüksüogo.

Sentong nung o jembiba mapang Advisor Vitsu-i, India nüjiso atema raratem nem tsüngsang agütsü, aser parnok nungi jakzükertem densemdakja parnoki pei taküm bendanga agütsüba wazüka ayutsü koda tongtimbang iba indang lemsatepa liasü.

Advisor Vitsu-isa, India

nüjiso atema raraba indang lemsatep aser mezüngdangma nüjiso atema raratem tasü aitba, pei taküm bendanga agütsüba aser parnok timtem tekangshi indang metetdaksü. Paisa, sentepa aliba lokti dang taruba putu ajungmesotsü atema nüjiso atema nokdakba tanüla ya mesamadaktsütsüla, ta ashi.

Pai ashiba agi, Kohima nung office tasenba ya parnok mapa asoshi parnok tushiba sabang ka asütsü aser iba ajanga linük atema nokdaktsü atema lanurtem ajungmesotsü.

AIFFSO Nagaland nung züngsem 73 züngoksema lir ta shia pai, "asenoki nüjiso atema

raratem tasü aitba aser parnoki pei taküm bendanga agütsüba mamatsüla aser iba ajanga linük asoshi nokdaktsü atema asenok ajungmesodakjang aser kasa mapang nung parnok aser parnok kinungertem nem akümtsübu tagütsütsü tim kechi ali aji agütsütsüla," ta ashi.

Er Vitsu-isa, old Industries office building nung iba lokti tentet atema takdang agütsüba asoshi Nagaland sorkar dang kanga pelaba lemsatep, koba ajanga state nung AIFFSO anep anepa inyaksangshitsü lenmang lapoktsüogo, ta ashi

Kohima Municipal Council Ward 12, Upper Chandmari Councilor Ahelie Theyo den Panchayat lenirtema iba sentong nung dena liasü.

Sentong ya AIFFSO Nagaland general secretary Mhao Kikon lenisüba nung agi, Working tir Kikrovi Sakhrie-i Tsüngrem temaotsü meshizüka sarasadem, tir Zeliethu Angami-i lokti pela agizükba o jembiba aser tatong tir Pusazo Sale-i tepela o jembiba liasü.

Dimapur nung GST training ka agütsü

Dimapur, Chiteni/July 30 (TYO): Drawing & Disbursing Officers (DDOs), dealers tem aser tanga stakeholder tem atema August 5 nü anogo ka atema Goods and Services Tax (GST) dak sendakba nung training katsütsü. Iba training ya Training Centre, Office of the Commissioner of State Taxes, Lengrijan, Dimapur

nung agütsü.

Training mapang DDOs aser dealer registration, TDS registration aser returns filing, payment, refund, offences aser input tax credit onüktem ayimjemtsü. Training nung session tem ya State GST ketdangsürtem, IT Cell, aser dealing assistant temi agütsü. Training nung shilem agirtem

nungi tasüngdangbatem bentetsütsü asoshi open house session tema agütsü.

Commissioner of State Taxes, Nagaland, Dimapur, Abhinav Shivam, IAS-i sangdong ka ajanga, ibala mesükba training sentongtem August ita zone balala aser ward office tem nungi agütsü ta metetdaksüogo.

SLDP batch 7buba training tenzükogo

Dimapur, Chiteni/July 30 (TYO): School 50 dak tema nungi tekolaktem atema School Leadership Development Programme (SLDP) batch 7buba July 29 nü SCERT, Kohima nung NECTAR project den longjemer tenzükogo.

Iba ya ita ka atema certificate programme ka lir aser Perspective on School Leadership, Developing Self, Transforming Teaching-Learning Process, Building & Leading Teams, Leading Innovations, Leading Partnership, aser Initiatives in School Education onüktem dak rangloker agütsü.

Training lapokba sentong nung Reader, SCERT Benjungdenla Yaden-i, SLDP batch trok atema training tembangogo aser August 29 nü batch 7buba training tembangba sülen Nagaland nung training magir shinga manungtsü, ta ashi. Laisa, training tembangba sülen tarutsü nung jenjang agütsü atema tetutyuba agütsütsü asoshi kuli balala dak ajemdaker bushisüngdang ka agütsü, ta ashi.

Commissioner & Secretary, School Education & SCERT, Kevileno Angami-i, SLDP ya school tekolaktem ajak atema kechi südir süaka agütsüba training sentong ka lir, kechiyong iba ya parnok mapa nung temaba jenjangi ajungkettsü atema asadanga mapang tongtimbang

lir, ta ashi. Laisa, school tekolaktem dang külem tenzükertem dang SMILE app nendaka amshitsü atema ajungshitsü ayongzüka liasü. Laisa, kakatshirtem parnok tarutsü atema maneni len sayutsü ajungshia liasü.

Kasa amapang nung Director, Directorate of School Education, Razouseyi Vese-i, training nung school tekolak tejentem anguba ajanga kanga ajungmesor aser iba ajanga parnok arangtetshia pei school tajungba kümdaktsütsü asoshi tejangraba aliba sayur ta ashi.

Lokti pela agizükba o jembiba mapang Additional Director & Cell Head, SIEMAT, SLA, SCERT, T. Lima Longkumer-i, aso 21buba nung school tem dak sempet asem alitsüla aji, tesayur pei tesayuba dak temulung lemteta aliba, purapitettsü atema mulunga aliba tesayurtem aser school lenir tashi taittem shirnoki külem tenzükertem aser kakatshirtem pei sasa dak temulung lemteta kümdaktsür, ta ashi.

Maneni Deputy Director, DoSE, Nellayappan B-i ashiba agi, taoba mapangbo school tekolak mapa ya anisüngzüka mapa ka ta züngshia liasü, ajisüaka tanübo iba mapa ya khuretulu abenba mapang tongtimbang ka kümogo. Paisa, parnoki angazükbatem külem tenzükertem danga sayutsü ajungshia liasü.

India-Pak ceasefire nung tasembuba telok maliasü: EA Minister S Jaishankar



New Delhi, July 30 (Agencies): Bodhbarnü Rajya Sabha senden nung Operation Sindoor onük nung o lemtepbä mapang nung External Affairs Minister, S Jaishankar-i, Pakistan aser India na tsüngda rara anentsü atema telemtebä agiba nung tasembuba telok maliasü, ta ashi.

Paisa, India aser Pakistan na tsüngda rara anentsü atema telemtebä agiba ya shishilembaba onük den sendaktepa mali, ta metetdaksü.

Mongolbarnü Lok Sabha nung Operation Sindoor onük nung o entepbä sülen Bodhbarnü Rajya Sabha nunga kasa onük nung jembidang Jaishankar-i, April 22 nungi June 16 anogo tashi nung Ato kilonser Narendra Modi aser US Tir na

phone ajanga mejembi, ta ashi. US Tir Donald Trump-i, shishilembaba onük nung ajemdaker pai tiyongtsüi ia jembiba ajanga India aser Pakistan na tsüngda rara anena liasü, ta jembiba o nung ajemdaker opposition party temi sorkar aija arudar.

Jaishankar-i, "Arrtsü adena kiralongrabaji India-i khenyongi magizüktettsü. India-i Operation Sindoor ajanga Pakistan nem telangzüba agütsü aser tarutsü nunga maneni yamaji inyaksü," ta metetdaksü.

India-i Indus Water Treaty tezüngzüktep agienba dak sendakba nung Jaishankar-i, "Kiralongrartemi Pahalgam amakba ya khenyongi magizüktetla ka liasü. Pakistan-i tera alia inyakogo. Azü aser

tzü na külemi ayimtsü makok," ta ashi.

Jaishankar-isa, Jawarharlal Nehru-i aibelenba Modi sorkari metongshia Indus Water Treaty tezüngzüktep agien, ta metetdaksü.

External Affairs Minister-isa, tangbo kiralongra ya alima nung tongtibang tebilemtsü onük ka kümogo, aser iba ya Modi sorkari inyakba agi lir, ta ashi.

Ghonda ka jungnüa jembidang Jaishankar-i, May 9 nü US tatong Tir J D Vance-i Ato kilonser Modi dang, Pakistan-i India sashia amaktsü senong yanglur, ta metetdakja liasü, aser ibaji langzüa Modi-i Vance dang, India-i telangzüba shidak agütsütsü ta ashi, ta metetdaksü.

Jaishankar-isa, Operation Sindoor ajanga India-i alima atema mapa tajung ka inyakogo, kechiyong India-i Pakistan nung kiralongra infrastructure aoyi kümtsüogo, ta ashi.

Tawa Jaishankar-i China semdangba atema opposition party karibo ashishia liasü, aser iba dak sendakba nung Jaishankar-i, kiralongra anema raratsü, arrtsülen tensa süngjemtsü aser shishilembaba tenokdangbatem agientsü atema jembitsü asoshi pai China semdang, ta metetdaksü.

2027 küm tashi nung rooftop solar plant cr. 1 amenoktsü: Centre

New Delhi, Chiteni/July 30 (Agencies): 2026-27 kümsük tashi nung sorkari PM Surya Ghar Muft Bijli Yojana (PM-SGMBY) scheme kübok kibong crore 1 nung rooftop solar plants amenoktsütsü, ta Bodhbarnü Lok Sabha senden nung New & Renewable Energy Union Minister, Pralhad Joshi-i metetdaksü.

Joshi-isa, linük nung renewal energy tsütsü terenlok atema Centre sorkari mapatong aika benoka inyaker aser schemes balala benoker, ta metetdaksü.

Question Hour mapang nung Union Minister-i, "2026-27 küm

tashi nungbo linük nung aliba states aser union territories ajak nung kibong crore 1 nung rooftop solar plant amenoktsütsü nükjidong nung sorkari 2024 küm February ita nung PM Surya Ghar Muft Bijli Yojana (PM-SGMBY) tenzüka liasü," ta metetdaksü.

Sorkarisa states aser union territories ajak nung Pradhan Mantri-Kisan Urja Suraksha evam Utthaan Mahabhiyan (PM-KUSUM) scheme benoka inyakdar, ta pai ashi.

Joshi-i, 2019 küm July ita nung Council on Energy, Environment and Water

(CEEW)-i agiba study 'Powering Jobs Growth with Green Energy' aser 2019 küm October ita nung TERI report ajanga asadangtetba agi, 2025 küm June ita tashi nung renewable energy sector nung mapa tasen lakh 13 adokdaksütsü, ta metetdaksü.

Union Minister-isa, Ministry of New and Renewable Energy indang Suryamitra, Vayumitra aser Jal-urja mitra Skill Development Programmes kübok training agir lanur 31,829 shi mapa nguogo, ta metetdaksü.



July 30, 2025 nü New Delhi nung Parliament kima Congress MP Sonia Gandhi aser Samajwadi Party (SP) MP Ram Gopal Yadav na den opposition MP temi Bihar nung Election Commission-i benokba Special Intensive Revision (SIR) anema longkak aيتدang tangokba noksa nung angur.

Court kati Kerala tsür nun ana nem bail magütsü

New Delhi, July 30 (Agencies): Tawa Chhattisgarh nung police-i Kerala tsür nun ana pua liasü, aser Bodhbarnü temepishiba ken o ka angadangba mapang nung Durg court kati nun ana nemji bail magütsüi, 'Bilaspur nung NIA court kati dang iba ken o a angadantettsü' ta ashi.

Nun ana jagi tangartem tamangba yimsü meyipdaksü aser nisung shibelen, ta tena nem tai tonglokja apu. Bajrang Dal züngsem kati ken o benokba nung ajemdaker tena apu.

Nun anaji maneni judicial

KOHIMA AOR TELONGJEM TSÜNGREMMUNG 2025 SENTONG

OMEN : YIMSOSHIBA

ANOGO : LUROI 1 ROGONÜ
(1ST AUGUST) 2025.
MAPANG : 11: 00 AKO
TESEM : AMPHITHEATRE KISAMA

Hasü
Dr S.C . Jamir Padma Bushan
Former Governor and Ex. Chief Minister of Nagaland

Yimpoksür
Wb. Metsübo Jamir
Minister for RD & SIRD, Govt. of Nagaland

KOHIMA AOR TELONGJEM KETDANGPURTEM

Tir : T. Chubayanger
Tadong Tir : I. Moanüsang
Tongti Zülur : Temjen Pongener
Repsem Zülur : L. Sashi Imchen
Senotsü Zülur : Mangyangtuba

SENTONG TARENSEN

MENDEN : KOHIMA AOR TELONGJEM KETDANGPURTEM

1. Tsüingremmung Imdongmak : Tanir Kohima Ongpangkong Telongjem

2. Temoatsü meshiba Sarasadem : Wb. Rev Sentisashi Aier, *Senior Pastor KABA*

3. Benjung Jazükba Yimyim : Wb. T. Chubayanger, *Tir KAT*

4. Tsüingremmung Ratet : Wb. Lanutemshi Longkümer, *DB MKG*

5. Tsüingremmung Salem O : Wb. Metsübo Jamir, *Minister for RD & SIRD, Govt. of Nagaland*

6. Tsüingremmung Ken : Watsü Telen, *Kohima*

7. Tayongzüikba : Wb. Marsanen Imsong, *Tir Ao Senden*

8. Hasü Ola : Wb. Dr. S.C Jamir Padma Bushan
Former Governor and Ex. Chief Minister of Nagaland

TSÜNGREMMUNG SÜDOKSÜNEM

Sentong Anir : 1 Wl. Narola Chuba, *Vice principal Baptist College, Kohima*

2. Wb. Bendangsashi Walling, *Asso. Pastor KABA*

1. Arr atsütep ken : Kohima Ongpangkong Telongjem

2. Kikore : Kohima Longjang Senso Telongjem

3. Tongshi Shijep : (a) Kohima Longsa Senso Telongjem
(b) Telok

4. Yartsüingsang : Kohima Jangpetkong Senso Telongjem

5. Arr Atsütepba : Legislators & Senior Officers Vrs KAT Sanen Luden
I/C KAOT

6. Molungsü O : Tsüingremmung Achaayangba Luden Tayonger

7. Na Aor Asü Maor : Dreams Unlimited

8. Sentongtempang Sarasadem : Wl. Rev. Yashila Jamir, *Asso. Pastor Women KABA*

TSÜNGREMMUNG BENJUNG CHIYUNG

TEMETETTSÜTEM

• Iba anogo nung Kohima nung alir Aotsür Aor ajak iba Benjungmung nung arua adentsü pelashishia jaoker.

Benjungmung nung adener ajaki Ao kin sobutsü sobur arutsü metetdaksür.

• Sendong temer Tsüingremmung Benjung Chiyung alitsü

• Iba sendong takok asoshi ajaki sarasadema atadi.

ket nung ayutsü. Court jagi, iba ken o ya National Investigation Agency (NIA) Act kübok lir, anungji Bilaspur nung aliba NIA court-i dang iba ken o angadantsü akok, ta metetdaksü.

Bajrang Dal züngsem kati ken o benokba nung ajemdaker taoba Hokolbarnü nun ana-Preeti Marry aser Vandana Francis na den Sukaman Mandavi nunger pua liasü.

Chhattisgarh Religious Freedom Act aser Immoral Traffic (Prevention) Act nung ajemdaker tena anema ken o

benoka lir. Ken o angadangba mapang nung nun ana atemaji ken o jembitsür, advocate Tamaskar Tondon-i, temelung malemba kija nung ajemdaker jungjunga bushisüngdang mesüi tena anema FIR benok, ta metetdakja liasü.

Osangbener den jembidang Tondon-i, "Court-i, iba ken o ya NIA court nung angadantsüla ta ashi, saka kechiba nun anaji maneni jail nung ayur? ta onoki asüngdanga liasü," ta metetdaksü.



TIR YIMYIM YIMOBILEM (EDITORIAL)

DIMAPUR

YANGTEPNÜ

CHITENI 31, 2025

Israel pu asemertem !

Tangari masü saka Nagaland nung yimten yimsüsüri dena Israel nungerbo ajak Khristan amai bilemer, ibayongji tang ama Israel o Gaza nung Palestine nunger yimten nüchiso bushir Hamas telok na tsünga raradang, Khristan-temibo Israel asemtsüla, kechiyong Israel limaji Khristan lima ta bilemer aser Palestine limaji Muslim nunger lima amai bilemer, anungji tang Israel o Hamas na raraba tongpang ya, tanga tongpang masü, Khristan o Muslim na tongpang amai bilema agir aser Khristan-tem aikati Israel tonga oagi meyaritetaka sarasadem nung Isreal nunger pusema yarir. Ajisüaka, Israel o Hamas na raraba ya Khristan o Muslim na tongpang masü, kechiyong Israel nunger nütsüng yongsük lakh 98 shi rongnung Yihusa nunger nütsüng lakh 77 shi saka Khristan yongsükbo lakh ana majung lir aser Muslim yongsükbo lakh 17 lir, anungji Israel nung Khristanem dang nungi Muslim nungertemang kanga agia teimba sükdangteter. Aji oda, Israel ya Yisu dak mamangertem Yihuda nunger lima ta kodang asenoki jangjadir, Israel o Palestine na mesüra Israel nunger o Hamas na raraba ya kodanga Khristan aser Muslim na rara masütsü saka ibai tamangba yimsü tsütsüang reprangdi süra, Israel o Palestine nungertem na rarabaji Yihuda nungertem o Muslim nungertem na rarar ta angatettsü. Atangji, Gaza nung alir Palestine nungertem rongnunga Khristan-tem lir, iba jagi Gaza nung tenla ki dena raksatsüba asenoki nguogo. Item tatalokbatemji kodang asenoki Laishiba nung reprangdangdir, Yihuda nungertemi Yisu alima nung parnok den külemi lia sayatenya mapa inyaka senzüaka parnoki pa dak mamang, anungji parnokiang paji tepset. Ibayongji, Yisu dak amanger Khristanem asoshibo Yisu ya alimai tanaben arutsü yongyaa atar saka Yihuda nunger asoshibo Tsüngrem chir, Messiah mezüng arutsü atar. Ibaji kodang angatetdir, Nagaland nung asen yimten yimsüsür kati Israel nunger pu asemabaji Khristan pur pu asema ama mangatettsü. Atangji, asenok ya tangar ama tashitemetet nisung masü, tongmelang taküm, iba jagi aiben asenoki tera metetbaji ajak meteta ama bilema jembir. Aji oda, Israel lima ya Yisu asoba, Yisu aliba aser Yisu sür shia arudak lima, anungji Israel limaji Yisu dak amanger Khristan lima asütsü amai asenoki bilemer. Ajisüaka, tanübo Yisu asodak Bethlehem yimsüng ya dena Israel kübok masü saka West Bank, Palestine kübok lir, anungji Bethlehem nungerji Israel nunger masü saka Palestine nungertem lir ta asenoki angatetdi. Aji oda, tang ya Hamas teloki Palestine yimten nüchiso asoshi rarar asünungji, Israel o Hamas na raraba ya, atangji, shitakba nungbo Israel o Palestine nungertem na rarar. Iba rara nung alima kintemi pei pei angatetba yari kari Israel aser kari Palestine nungertem asemer. Aji oda, tamalen India nung Congress teloki yimsü asüba mapangbo India-i Palestine asem saka tang BJP teloki yimsü asüba mapangbo India-i Israel pu asemer. Ibayongji, Nagaland government nung BJP lenir aser Deputy Chief minister Y.Pattoni Congress telok aija jembidang, BJP telokiang Israel asemer kechiyong aji Khristan state saka Congress-ibo Muslim state Palestine asemer ta pai angatetba ka shitak amai bilema yimjak nung jembiba agi, pa dang masü saka Naga nunger yimten yimsüsürtem ajak asoshi alima yimten otsü aser tensa mapang indang jungjunga metettsü nüngdakba indang rajemtsüogo. Atangji, alima yimten otsüji sen masü aser tsük a masü, anungji memetetyonga kecha balaka masü ta bilema alitsüa akok, ajisüaka yimten yimsüsür ka asoshibo asen lima yimten yimli indangang masü saka tangar alima kintem yimten yimli otsü metetbaji kanga tongtibang lir, iba jagiang pei yimten yimli sentonga junga yanglutettsü aser tangar mulunga koka jembitettsü. Atangji, yimten yimsüsür ka akümtsü atema tazüng temetetba jenjang kecha balaka lateta maka, anungji azüng zülü mashiba nisunga yimten yimsüsür kümtettsü, ajisüaka tanübo tashitemetet nung toktepa aienba putu asünungji, asen daka tashitemetet alitsüla aser iba tashitemetet jagi nübortem yaritettsüsa Tsüngrem dang shisatsü meshitsüla. Idangjiang, Israel aser Palestine nunger otsütem dang masü saka asen otsüa aser nüngdaka tajungba metettsü.

OLEMSABANG

Ali tasen nung aluyimba aser agri lime

Intilemla,
Assistant Chief Technical Officer (Soil Conservation),
Krishi Vigyan Kendra Mokokchung.

Aluyimtsu asoshi ali nung kanga tongtipang ka ji **ali pH** ya lir. Iba pH ya ali ji kechi yimya mesüra jakla, iba dang ji ashitsü akok. Iba ali pH ya aluyimba asoshi mezüngbuba aser tontipangtiba lir koba ji ali tendangba (soil test) ajanga metettsü.

pH ya ali nung Hydrogen ion (H+) koma sashia ali iba ajangji metetter. Iba pH ya scale 0-14 tashi nung alir. Scale nungji 7 kodang südir ibai neutral (tanang) ta ashir, 7 tekübok (<7) asünungbo iba ali ji acidic (tasen) ta ashir, koma ajemer yamaji tasen, maneni 7 tema asünungbo alkaline (taapak) ta ashir. Ali nungi tsünüsempongtsüi mol agitettsüba aser tajungtiba nung aintsüba ya ali pH dak tuluka keta lir.

Ali Indang pH ji tanang- neutral (7) anasa ali nung dang ali nung keta aliba mol mesüra enokba moltem ji shitak tera agi agitetter. Ali kanga tasen nung Aluminium, Iron aser Manganese ya kanga tali alir, iba jagi tera asoshi timtem agütsür aser Nitrogen, Phosphorus, Sulphur, Calcium, Magnesium, Boron aser Molybdenum bo ajema alir. pH 5.5 tekübok nungbo ali nung mesen tajung (bacteria) ajema kümadoker aser parnoki yakyaka mapa meinyaktetter.

Asen Mokokchung lima tekong tenem, tsüngküm mongpu, süngdonglidong aser tzunglu sashia aruba ajanga asenok ali ya tasen akümer. Ibai aluyimtsü asoshi tenokdangtsü tuluka lir kechiba ta süra ali tasen nung aluyimtsü tasak aser junga mezüsentetter.

Ali tasen ya tanang kümdaktsü nung dang ali nungi aseni tsünuba ajak junga adoktsü. Kechi inyaknung ali tanang akümtsü? Asenoki agri lime (Calcium carbonate) mesüra aluyimba nung amshiba shinü ta ajar iba ya amshi nung iba timtem ya malitsü mesüra ano süng arondang aluba aut ya amshitettsü. Agri lime ya koma anük, yamaji maparen nung kara inyaker tetezü ali tanang kümdaktsür. Aut ajanga Potassium, Calcium, Phosphate, Boron yamala mol tema agütsür. Aut ya bulua ali nung amshia alinungbo ali ji tanang kümdaktsür.

Ali ajak pH balala amai Lime Requirement (LR)- agri lime kwika amshitsü/ enoktsüla ibajia balala asür. Soil laboratory nung ali test sür tasen asü nungbo, Lime Requirement ya repranger. Alu ajak nung ibai value balala adoktsü, koba dak ajemdaker ang agri lime ji enoker.

Aiben iba agri lime inyakyim mesüra pa ajanga kechi tajangzük agütsür shisa junga mangatetba ajanga asenoki ibai mashiyimi amshitsü ana nung lir. Anungji iba ocet ajanga aseni agri lime amshiyim kar lemsatepber.

Asenoki asen ali pH mezüng repranger lime requirement- tetezü agri lime kwika enoktsüla iba tasazük ji bener arutsüba mesüra alitsüba tasak. Kechiyong ibai tangalen nungi bener arutsüba dang mesüra alitsü atema bulua mangur. Anungji pH 5.5 tekübok asü nungbo, asenoki ter shilem nung shilem ka ama (1/10 th) ali nung line tur kelen iba line nungji 250-400 kg/ha esap nung amshitsüla/ enoktsüla. Ali nung mol aika alinungbo mesüra ajungli nunger nung timba nüngdaktsü. Alu nung hopta asem pezü jilia lia ali line tur agri lime ya line nungji peroka enoktsüla, kechiba ta sürabang agri lime ya enoker ali tanang akümtsü asoshi mapang agir. Iba line nung ya dang metsü yoktsüla mesüra aonsotsü temji azüngtsüla. Aji oda inyakba ajanga agri lime amshiyim nung kümdanga tenüngdakba jaka nung dang enoker aser tera ayangba jaka nungji ali ji tanang kümdaktsütsü, mesen tajung-ia mapa inyaktsü aser ali nung aliba mol tem tera ajanga agitettsü. Iba inyakyim ya metsüjang mesüra aonsotsü ajak atema yamai inyaktsü akok. Asen alu nung iba yimya nung agri lime amshiba ajanga kecha timtem meli dang ali pH ji tanang kümdaktsütsü.

Agri lime ya asen lima nunga paper mill mesüra limestone mine ajanga jenjang talangba nung aluyimer asoshi angutsü akok. Aonsotsü kar bo ali tasen asüyonga oda peta adoker, tateshitsü agi tsük, coffee, süngo, alishi, chenang, etc. saka aonsotsü mesüra süngjang lijang todong nunger timba ka ph tanang nüngdaker. Agri lime amshiba ajanga aseni tsünuba temji tajungba nung aintsü aser timba angutsü, tetezü aluyimba nung takoksa kangabo majurutsü. Iba ali yimya jakla (tasen) ajanga aluyimba nung timtem agütsüba memetetba yong tanu asen aluyimer kanga meranga inyak yonga aiben aluyimba nung tangar memenuper. Anungji asenoki tanu iba ocet tatsüka ya ajanga ali tasen nung agri lime amshiyim angazükogo ta amanger.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Odisha nung sarasadem sentong ka agiba sülen Khristantem amak



Odisha nung Malkangiri district kübok Kotamateru yimdak Sukra Madi yirur lia tangokba noksa nung angur.

July 30, 2025: Odisha nung Malkangiri district kübok Kotamateru yimdak Khristantem amakdang yirur ka, Sukra Madi tang tashi hospital nung mongdar.

Taoba ita pastor tem sarasadem sentong ka nung adenba sülen meyipa aoba mapang nung lokti kati parnok amak. Iba mapang nungji pastor tem rongnung ka tebu Sukra Madi-i par jabaso dang, "Ni meküzmüksüa akok, ajisüaka ni Teyanglur Tsüngrem den alitsü, anungji na shisabulu masütsüla," ta shia liasü. Iba sülen pa süchia ao.

Lokti kati amakdang yiruba Khristan 30 rongnungji arrshi küm 52, Sukra Madi densema liasü. Kotamateru yimdak alu nung tsünütsü atema metsühjang meshitetba sarasadem sentong ka nung adenba sülen meyipa aoba mapang nung tribal yimsü amanger yimdaklirtemi Khristantemji amak.

Khristantem amakba mapang nungji pastor Manglu Madi-i tebu, Sukra Madi kümzüksü meranga liasü. Tebu kanga mejungi yirur lia pai tebuji anasa aliba ki kati atsüer oa liasü.

Iba anogo nungji akhi tribal yimsü amangertemi alu nung aonsotsü jenti moatsü atema an tenla agütsüba sentong agi, ajisüaka yimdak Khristan kibong 11 jagibo anasa aliba yimtsüng 15 nungi pastor tem jaoka temoatsü meshia sarasadema liasü.

Pastor Somru Muchaki-i, "Onoki iba sentong agitsü atema tezüluba nung temepishiba shidi agütsüba ama onok nem temelaba agütsü," ta metetdaksü.

Iba anepdangji yimtsüng balala nungi pastor tem motorbikes nung aru aser tekülem sentong tembangba sülen nikongdang 12:30 ako nung parnok meyipa ao.

"Sarasadem agiba tesemji arem agi longbanger lir, ibayongji onok külemi dang meyipa aotsü atema telemtetba agi. Tenla ki anasa süngdong tuluka adena aoba mapang nung yimdaklirtemi onok soitba sülen onok dang asüngdangya, aser tanga yimtsüngtem nungi pastor tem jaokbaji ashishia liasü," ta Pastor Madi-i ashi.

Osangbener den jembidang pastor Muchaki-i, "Onoki parnok dang, onoki metsühjang meshiteta sarasademba sülen chiyungtepa liasü, ta ashi. Ajisüaka onoki tangartem Khristan yimsü dangi meyipdaksüba sentong agi, ta onok nem tai tongloktsü. Iba sülen parnoki onok dak azük tenzük. Iba tatalokba nung Khristan 30 shi yiru aser nisung 10 bo hospital-i anir aotsüsa aküm," ta metetdaksü.

Pastor Machuki-i, "Onok dak azükertem dang nungibo onok teimba liasü, anungji onoki parnok nokdangtetla, ajisüaka Laishiba ajanga meraratsü ashir. Anungji onoki tendaker parnok nem zükdaksü," ta metetdaksü.

Yiruba Khristan 30 nungjagi parnok 10 bo hospital-i anir oa anogo ternü among, ajisüaka nisung pezü- Sukra Madi, Ganga Sodi, Podiya Kowasi aser Erma Madi nungerbo temang tamajungba dang akümba agi Andhra Pradesh state nung aliba MIMS Hospital-i anir ao.

Pastor Madi-i, "Doctor temi parnok asem nem mozü tasen agütsü, saka kübubo surgery agitsüsa akümer, saka iba atemaji dollar sen 1,600 nüngdaker," ta ashi.

Paisa, "Onok ket nung sen mali, anungji onoki Tsüngrem dang surgery magiaka kübo anepadoktsü atema sarasadem, " ta metetdaksü.

Takoksa angur Khristantem rongnung ka, Laxman Kumar Beti-i June 22 nü Malkangiri police station nung yimdaklir nisung 16 anema ken o benokogo.

Rastriya Christian Morcha state general secretary, putir Pallab Lima-i, "Video kuli aika liaka aser kanga mejungi yiruba medical kuli liaka ketdangsertemi tang tashi nung aibelener ka danga mapu," ta metetdaksü.

Ano külen police-i Khristantem dang yimdaklirtem denji tajungtiba nung angatettepa ken o ajak tembangtsü mepishir, ta Pastor Muchaki-i ashi.

"2014 küm nungi tenzüka tang agi tanabenbuba iba yimdak Khristantem amaker. Item tatalokba asemprongla nung police-i Khristantem dang aibelenertem den ken o angatettepa tajungtiba nung tembangtsü dang mepishir," ta paisa metetdaksü.

Pastor Manglu Madi-i, "Tawa iba tatalokba nung nia tekolak, tenarong aser teni yiru aser temang ajak nung zübo keta liasü. Sayatenya ajanga dang ni tasü nungi kümzüka liasü. Iba sayatenya ajanga kübu-a kümzüksü atema ni sarasadem, " ta metetdaksü.

Kotamateru yimdaklir tribal yimsü amangertem aser Khristantemji Gondi kin lir, ajisüaka police-i Khristantem denji Odia oshi agi dang jembia liasü.

Pastor Muchaki-i, "Onok ket nung onok dak azükba video, noksa aser medical reports lir, ajisüaka police-i aibelenertem anema inyaksü memelunger," ta ashi.

Khristantemi District Collector's office-i oa temepishiba shidi ka agütsüba sülen ketdangsertemi aibelenertem anema inyaksü ta ashi, ajisüaka tang tashi kecha meinyaker.

Police-i anogo 10 tashi kecha meinyakba agi Rashtriya Christian Morcha Odisha unit, Malkangiri District Christian Manch aser Voice Against Hate-i longkak aitba sentong ka ayongzüka aibelenertemji tangsa aputsüla, ta takhangba agütsü. Longkak aitba sentong nungji nisung 7,000 dak tali aden.

ANOGO ABEN TSÜNGREM DEN

Tenüing ka !
T.Ken 72:12-20

"Pa tenüing tatem makai temjentsü; anü ali tashi Pa tenüing maneni alitsü: aser nisungtem Pa dak moatsü; kin ajaki Pa dang tepela ta ajatsü" (t.17). Ibai ken züluba tetenzükabajibo Solomon indang zülu saka tekong 17 nungji noksa asenoki angur.

Iba yagi Pa tenüingtem indang jembir. "Na Pa tenüing Yisu ta ajatsü, kechiaser pai pei nübur parnok temenen nungi kümzüksü" (Matt. 1:21). Pa tenüing tetezüji- Kümtetdakba. Ibai kechi koma tenüing ka? Ibai teti aliba: "Pa tenüing teti alitsü" (t.17). Asenok meimchir shiba südir süang, taküm alidang ajaki metet ama alitsü, saka kodang südir, yakta pa/la tenüing amadoker. Saka Yisubo kodanga mamadoker. Pa teti aliba tenüing ka lir, "meimchir ajak dang temaba tenüing" (Fil. 2:9).

Yisuji ano temoatsüba tenüing lir. "Nisungtemi Pa tenüing moatsütsü." Tenüing karibo temoatsü bena marur- parnoki atak atem bener arur. Atangji nai ner chir tenüing "Yihuda" majatsü mesüra ner jala "Jezebel" majatsü. Saka Yisu tenüingji temoatsüba tenüing lir. Iba yagi temoatsü bener arur. "Asenok tanela temoatsü agi Yisu Khrista nung moatsü" (Ef. 1:3).

Pa tenüing temoatsüba tenüing. "Kibuba Tsüngrem, Israel Tsüngrem temoatsüba liang" (t.18). Tesüngmangtsü mapa inyaksü asoshi Tsüngremi Yisu Khrista ajanga asenok moatsür. Tenyartem tebang nung Yisu Khrista aliba asenok T.Mapa kaket nung angur. "Nazaret nung Yisu Khrista tenüing nung noktakang aser jajaang" (3:6). Pa tenüing metettsü koda maongka tulü. Asenoki Pa tenüing nung sarasademsü aser tenzük kechi koma tashi (authority).

Yisu ama tangar mali. Iba ain aser tashi agi sünga lir. Shirnoki Pa tenüing metet parnok nem temoatsü aser takok bener arutsür. Nai Yisu ne Kümtetdakba ta meteta lir ma? (Shibaisa Kibuba tenüing nung jadir kümzüksü)Rom 10:13.

Indonesia nung Muslim nungertemi Prayer House ka amak

July 30, 2025: July 27, 2025 raksatsü.

nü Indonesia nung Koti Tengah GKSI Anugerah Padang district kübok Padang Sarai church nung pastor-i, Prayer yimdak Muslim nunger telok kati House nungji tanur aser Prayer House ka amak, ta tsürabur Khristantem 30 shi International Christian Concern tekülem sentong tagidak (ICC)-i metetdaksü. mapang nung Muslim

Prayer House ji Indonesian nungertemi amak, ta Faithful Christian Church metetdaksü.

(GKSI) Anugerah Padang Khristan kibongtem nungi meyong lir. Muslim nungertem tanurtem nem Khristan yimsü jagi Prayer House nungji dak sendakba shisaliok osettsüset ajak raksatsü. agütsütsü nükjidong nung

Muslim nungertem jagi Arogoi Prayer house ya tashiyim amshia Prayer House amenoka liasü, kechiyong public telungi aiba sülen 'Senshiang, school tem nungbo Khristan Senshiang' ta ayimdena liasü. Ki tanurtemi Khristan shisaliok telung nungji Khristantem aika kecha mangur.

Ia ka tejaklen Indonesia kichiba aser osettsüset kübok Sukabumi nunga Muslim raksatsü. Iba tatalokba dak nunger telok kati Christian sendakba nung police-i nisung students retreat ka tagidak 9 puogo. mapang nung timtem agüja

Muslim nungertem jagi liasü. osettsüset raksatsüba mapang Indonesia linük temzüng nung oset tejaksa agi tanur ana ajanga senso ajak nem yiru. Iba sülen Khristantemji tamangba yimsü temeden jena oadaok. agütsür, ajisüaka Muslim

Parnoki menden aser nüksüng teimba aliba linük nung electronic osettem raksatsüba mapang shia Khristantem den külemi electric inzü anema inyaker.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Tesadang

(adj) ka agi ana akümba, telem dang ka (half)


* Takarsang akaba rongsen tesadang ka arogo nem agütsü.

Tesadem

(adj) tesem tulu, temesü masü (wide)

* Onoki tesem tesadem ka nung mung dang ki asü.

OLONG PAITEP # 7224



TIPIEN

1. Aon kenshiba - (6)
5. Kilem merang - (6)
6. Shiruru tila ka - (4)
7. Nüktzü alu - (4)
10. Kimong ana tsüngda ayuba - (5)
11. Jaka melenshi - (5)
12. Ishika - (4)
15. Mi apudak - (4)
16. Külen masü - (6)
17. Aor benjung ka - (6)

LANGTSÜNGLEN

2. Koktet - (8)
3. Tangar maden - (4)
4. Maneni - (3)
6. Tekolak sobutsü - (6)
8. Yimdangi aru - (8)
9. Atenshi - (6)
13. Khu abenba süngzü - (4)
14. Tesangwa tulutiba - (3)

OLONG PAITEP # 7223 TELANGZÜBA

TIPIEN :

1. Menungra, 6. Orak, 7. Mimong,
8. Aika, 11. Rata, 14. Tiyazü,
16. Anempong.

LANGTSÜNGLEN :

1. Medemer, 2. Nahum, 3. Nisung,
4. Aoksa, 5. Takok, 9. Azüpong,
10. Timtem, 12. Aginü, 13. Anema,
15. Apuso.

NAI-A YA METETTER MA



Nai nisung ka dang senjang meyi ka (Rs. 1000 coin) lir mali ta asüngdangra malia ta dang langzütsü kechiaser ibaji buluabo mangur. Aji oda süaka, Reserve Bank of India (RBI)-i taküm January ita nungi sen meyi ka 'coin' adoker. Thanjavur nung aliba Brihadeshwara Temple yanglur küm meyi ka ajungba nüngtem nung Mumbai mint ajanga ibaji yanglu. Aji oda süaka, idakji ajenoka aliba 1000 dang nungibo jenjang teimba agiang nüburti ibaji aliteper. Brihadeshwara Temple nüngtem nung yangluba coin atemaji mezüngbo RBI nungi demand draft Rs. 5000 agütsür meshi saka tangbo Rs. 7000 agi open market nung angur. Coin-ji tuozük nung gram 35 lir aser noklang shilem nung 80 silver aser tanüngbaji copper agi yanglua lir.

Gauhati HC-i Assam, Arunachal, Nagaland & Mizoram nem tetuyuba agütsü

Guwahati, Chiteni/July 30 (Agencies): Northeast nung state balala tsüngda arrtsü nung arem ali atsünger aliba ken o bentettsü atema Gauhati High Court-i, Assam, Arunachal Pradesh, Nagaland, aser Mizoram dang high-level committee ka amenoktsü tetuyuba agütsüogo.

Chief Justice Ashutosh Kumar aser Justice Arun Dev Choudhury nati kümtetba division bench kati Mongolbarnü arem ali atsüngba dak sedakba nung Public Interest Litigation (PIL No. 77/2018) ka angadangba mapang iba tetuyuba agüja liasü.

Guwahati nung amendaker aliba NGO, Asom Basaok-i 2018 küm petition ka benok aser ano 2023 küm Sreebhumi district nung alir anati Assam kübok arem ali atsünger alirtem

anintsü khanga petition ka benoka liasü.

"State ajak nung chief secretary aser forest department tekolaktem aser ken o dak sendaka aliba stakeholder tem densema high-level senden ka ayongzüka, arem ali atsünger aliba azüngtetsütsü atema sentong yangluang," ta HC bench yagi ashi.

Assam nungi D. Saikia, Mizoram nungi B. Deb, Nagaland nungi K.N. Balgopal aser Arunachal Pradesh nungi A. Chandran ta Advocate Generals temi arem ali matsüngdaksütsü atema parnok bendanga agütsür aliba lemsatopogo.

Okdaki ashiba agi, iba mapa atema tasa asatsü asoshi state ketdangsürtem tsüngda senden aiben menogo.

Assam, Arunachal Pradesh, Nagaland, aser Mizoram nungi Advocate General temi High-Level senden ka ayonga amentsü mulunga agizükogo.

Iba senden nung state ajak nungi Chief Secretary tem aser Forest Department tekolaktem aser ken o dak sendaka aliba stakeholders tem longjemer arem ali atsünger aliba azüngtetsütsü asoshi tasa ka asatsü.

Okadakisa, arem kümzüka ayutsü atema tang state tem tsüngda arrtsü nung mangatettep aliba bendanga ayutsü telemtetba agiba atema pelaba lemsatopa liasü.

Arrtsü nung arem ali hectar 1,500 nung ozüng alema kiojen balala 2,500 dak tema yanglur aliba merektettsü atema iba inyakyim ya benoka inyaksü nükjiding lir.

Rengma Reserve Forest atsünger alirtem aninogo: Assam CM

Guwahati, Chiteni/July 30 (Agencies): Assam Chief Minister Himanta Biswa Sarma-i Bodhbarnü ashiba agi, pai aniba sorkari Golaghat district kübok Rengma Reserve Forest nung ozüng alema ali atsünger alirtem takok ngua aninogo.

X ajanga Chief Minister-i, "onok meyong kechi aji meyipa agitsü onoki inyakdar. Ozü arem, ozü ali, ozü Satras, ozü alu- Chichiba India nunger lisopurtem dang Assam nung aliba ajanga jangra ademtsü. Rengma Reserve Forest - tang ENCROACHMENT FREE" ta pai zülutsü.

Uriamghat nung July 29 nü ozüng alema ali atsünger alirtem aninba mezüngbuba shilem benoka inyakba sülen Sarma-i iba olen lemsatopa liasü.

State administration-i mezüngbuba anogo ozüng alema yanglur aliba kiojen 120 dak tema merektettsü aser arem ali hectar 4.2 meyipa agiogo.

Iba inyakyim ya Bidyapur Market aser iba temeket nung aliba yimtsüngtem nung benoka



inyak, kong Sonari Beel, Madhupur, aser Dayalpur densema liasü.

Ketdangsürtemi ashiba agi, iba inyakyim benoka inyakba nükjidingji arem ali begha 11,000 shi atsünger aliba azüngtetsütsü atema lir.

Assam Police officers, CRPF troops, forest guards, magistrates densema personnel 2000 dak tema den excavators 100 shi-iba inyakyim nung shilem agia liasü.

State tsüngda kecha mepetmesü madoktsüatema Assam sorkar aser Nagaland

sorkar na angatettepa inyakogo.

Golaghat district administration-i ashiba agi, ali azüngtetsütsü atema osang agütsüba sülen iba tesem nung alir shilem 70 shi-i parnok mulungka nung iba tesem azüngtetsür liasü. Iba tesem nung alirtem aika Nagaon aser Morigaon district temi ogo.

Parnok timba ka ket nung kuli kaket shidak maliasü, saka ketdangsürtemi Forest Rights Committee (FRC) certificates tapet bena aliba Bodo, Nepali, aser Adivasi nungertembo toktsüogo.

Manipur nung sen crore 15 alang heroin bener nisung 3 apu

Imphal, Chiteni/July 30 (Agencies): Central aser state police team kati temesepba mozü shibelener asem apu aser parnok ket nungi heroin seret asem shi nguteta liasü. Temesepba mozü ya Myanmar nungi Manipur-i shibelener aruba liasü.

Sepaitemisa Manipur nung Churachandpur district kübok international arrtsü meita aoba mapang prangbong ter aser grenade launcher ka ngutetogo.

Ketdangsürtemi ashiba agi, sepaitemi pua aliba heroin ya shishilembadak sen crore 15

alang asütsü.

Ketdangsürtemi Bodhbarnü sangdong ka ajang ashiba agi, centre aser state police na longjemer taoba ghonda 36 tsüngda L. Kanan aser Songpi yimtsüng meita oa liasü.

Mezüngbuba meita aoba mapang sepaitemi L. Kanan yimtsüng nungi nisung asem pua liasü. Police temi pua alirtem ya Ginmang Haokip, Seikholen aser Lalzui Vaiphei ta jangjaogo.

Parnok ket nungi heroin tsünger aliba soap cases 269 aser mobile phone asem nguteta liasü.

Kasa team-isa Churachandpur Police Station kübok Songpi yimtsüng meita aoba mapang prangbong ishika ngutetogo.

Parnoki 9mm pistol pezü den magazine asem, single-barrel rifles trok, M79 grenade launcher, ka aser .22 caliber rifle ka den magazine ka nguteta liasü.

Ketdangsürtemi ashiba agi, arrtsü adena temesepba mozü aser prangbong injang shibelenba nokdangtsü atema meita aoba nung shilem ka ama iba meita aoba sentong ya ayongzüka agiogo.

Tariff soita ataba atsülangtsü asoshi US aser China jembitsü

Stockolm, Chiteni/July 30 (Agencies): Stockholm nung anogo ana shishilepmaba indang jembishinüba Mongulbarnü tembangba sülen United States aser China nati tariff tasen meshi tenzüchtsü anogo atsülangtsü asoshi inyakteptsü mulungtepogo, ta Beijing ketdangsür kati ashi.

US-i mapang atsülangtsü indang jembi saka telemtetba magi ta ashir.

Linük ana tsüngta süoki ia aser tangatetba tajung nung sensaksemogo aser August 12 tashi tariffs soita atatsü aliba alema ano anogo 90 atsülangtsü asoshi inyaktsü mulungtepogo, ta China-i ashir.

"China-US rongsenketzüng aser shishilempaba tesendaktep tajung aliba ya linük ana terenlok atema kisüng masü saka alima rongsenketzüng ainba nunga yarir," ta China indang Vice Premier He Lifeng-i ashi, shibai China tsütsü iba ken o jembirtem anir lir. Ajisüaka pai mapang atsülangba ya komaka inyaktsü, ajibo mashi.

U.S. Treasury Secretary Scott Bessent-ia Chinese delegation den anogo ana jangratema jembishinü kaogo ta ashi.

Iba mapang China-i Iran nunger totzü aliba, Russia nem tongpang nung amshitetsüsa dual-use tech agütsüba aser alimai nüngdakba dang nungi tali osetsüset yangluba asoshi US-i süoki ia bilemba nunga kongshi, ta pai ashi.

"Rare earths nunga süang, semiconductors, medicines nunga süang, industries

tongtipang kar nung makoksatsü nüngdaker, aser anatsülen ajangzüchtsüsa tesendaktep alitsü asoshi kechi inyaktsü ta onoki jembi," ta Bessent-i ashi.

US-i domestic manufacturing akhi ama akumtsü, US agriculture aser energy products indang purchase agreements yanglutsü aser trade deficits ajemtsü meranger, ta pai ashi.

Alima nung economies tsütsü tulutiba linük ana tsüngta tariffs mechi shishilempaba tesendaktep mejungi kumer aliba bentettsü meranga tang tesüsa jembishinü ya Stockholm nung Hombarnü tenzüka liasü.

Linük ana ya taoba mapanga Geneva aser London nung ajurutepa tariffs shilem noklang dak tema meshitsü sangdongba ajang shishilempaba nung tesendaktep raksa aser tongtipang oset nung export controls tenzüik, kong China-i rare earth magnets soit aser US-i semiconductors nung tenokdangba agüja liasü.

Sweden Ato Kilonser Ulf Kristersson indang office nung Hombarnü osangbener medeni jembishinüba ghonda pongu jungnüa liasü. Mongulbarnü jembishinü metenzükdang Kristersson-i Besent aser U.S. Trade Representative Jamieson Greer ajura liasü.

Tir Donald Trump-i China Tir Xi Jinping den ajuruteptsü asoshi sentong kanga aroka shisadangba mapang Stockholm nung jembishinü tenzüik.

"Küm matemdangsa amentsü," ta Trump-i Mongulbarnü Air Force One

nung osangbener dang ashi. Pa indang social media sapang Truth Social nunga pai Xi den senden amentsü bushir masü saka China leniri jaokba ama China-i aotsü akok, aji mesüra janggrabangra mali, ta Hombar aonung ashi.

Bessent-i osangbener dang Stockholm nung iba senden (linük ana tir ajuruteptsüba) indangbo mejembi saka China nunger den trade team aser Treasury team ajurutepa jembitsü asoshi tir ana tejangraba indangbo jembi ta ashi.

American team ya Washington-i meyipa aotsü aser tir den August deadline atsülangba indang jembitsü, ta Greer-i ashi.

July ita tetenzüklen Trump-i linük aika dang tariff rates timba meshitsü sangdongba sülen US-i Britain, Japan aser European Union densema trading partners kar den tariffs asoshi tezüngzüktep yanglua lir.

"China nunger dak tebang o kisüng masü mapa dena lir. Tang mepetmesü lir, saka asenoki mapang shia parnok den ajurutepa item ken o jembiba ajanga item jembishinü asoshi mera tajung agir," ta Greer-i Hombar aonung social media nung ashi.

Linük ana ya May ita Geneva nung senden amendang tariff anogo 90 soita atatsü lemtet, koba August 12 nung tembanger. Tang US-i China nunger oset nung tariffs shilem 30 meshir aser China-i US nunger oset nung tariff shilem 10 meshir.

TENÜNGSANG AGÜTSÜR

Wb. Lemdongmeren,
Wb. Kikumsungba & Wt.Kitennaro (Chuchuyimlang) na jabasoi Nagaland Staff Selection Board (NSSB) ajanga agiba tatidang nung State Taxes department kübok LDA-cum-Computer Assistant mapa angutsüsa takok tajung anguba asoshi 2 Buba Medemsanger Sungpu Zünga, Chuchuyimlang, Mokokchung Unit-i pa nem tenüngsang tulu agütsür.



Ano tarutsü nunga pa mapa nung maneni takok tulu ngudakjangma ta Zünger telungjemi sarasadema moatsür.

Sdl- President

Sdl- General Secretary

GOVERNMENT OF NAGALAND

DIRECTORATE OF HEALTH & FAMILY WELFARE

NAGALAND: KOHIMA

No.DHFW-8/MC/P-III/9/HR/2022 Dated Kohima July 2025

ADVERTISEMENT

Applications are invited from eligible candidates for the post of Academic Dean at Medical College, Mon.

The details of the qualification, experience, pay scale, application forms etc. may be obtained from the websitehttps://nagahealth.nagaland.gov.in/

Filled application form along with two copies of attested documents should be submitted to the office by mail/hand/post on or before 29th Aug. 2025 3:00 PM as indicated in the application form. The shortlisted candidates will be intimated for further interaction.

(DR. MERENINLA SENLEM)

Principal Director,

Directorate of Health & Family Welfare

Nagaland : Kohima

August 1 nungi tenzüka India dang tariffs 25% meshitsü: Trump

Washington, Chiteni/July 30 (Agencies): August 1 nungi tenzüka India nungi bener aruba oset nung tariff shilem 25 meshitsü aser mejangjaba temerenshi ka agütsütsü US Tir Donald Trump-i sangdongogo. Pa indang social media sapang Truth Social nung India dang tariff aika meshiba ya non-monetary trade barriers aser Russia den maneni mitkar aser energy tesendaktep aliba mechi lir ta ashi.

"India ya asen tembar, saka parnok indang tariffs kanga tali asüba yong parnok den shishilempaba kanga ajema lir...aser non-monetary trade barriers tesashitibaji parnok dak lir," ta Doland Trump-i zülü.

Pai maneni Russia den India indang defense aser energy tsütsü tesendaktep aliba aija, "Parnoki teti par mitkar oset timba Russia nungi alir, aser nisung ajaki Russia dang Ukraine nung nisung tepsetba anendaktsünüadang China den külemi Russia indang energy timtiba pari alir," ta ashi.

"ANUNGI INDIA-I ITEM ATEMA TARIFF SHILEM 25 DEN PENALTY KA AUGUST 1 NUNGI TENZÜKAAGÜTSÜTSÜ," ta Donald Trump-i ashi.

India sorkar osang ka ajanga ashib ashiba agi, ketdangsürtemi Donald Trump indang sangdong, talisa tariff shilem 25 aser mejangjaba temerenshi ya özüng agi mela asü nokdanga ali aser 'scope' shisadangtar.

Shilem 25 ya taoba mapang

den medemdangra kanga tesüngmangtsüka aikabo masü saka India-i kanga junga asadangtsü ta osang ajanga ashi.

April ita Donald Trump-i India nunger oset nung tariff shilem 27 tashi meshitsü benok, saka mapang tatsüka lir jembishinü metembangi aliba yong anena ata. Iba sülen linük ana tsüngta jembishinü tenzüikshi aser teimla tajung sayua liasü.

Taoba mapanga US Trade Representative Jamieson Greer-i, "Onoki India nunger den maneni jembir. Parnok den teti sensaksem kanga tajung lia arur," ta ashi. India indang 'protectionist trade policies' ajanga timtem ajuruba indang Jamieson Greer-i lemsatop aser Donald Trump indang trade agenda ya US exports asoshi aser talisa sensitive sectors nung market access dak rangloker lir ta shia liasü.

Tawa tashi United States ya India indang trading partner tulutiba liasü aser linük ana tsüngta 2024 küm shishilempaba ya sen \$190 billion jenjang liasü. Donald Trump aser Ato Kilonser Narendra Modi, tenaprongi yimjak nung tarutsü nung shishilempaba ya anasü dak tali agi timba kum \$500 billion tashi akumtsü mangdang aliba lemsatepa liasü.

India-i Bourbon whiskey aser motorcycles ama US oset teshimtet nung tariffs ajema lir. Ajisüaka India den shishilempaba nung US maneni trade deficit \$45 billion lir.

Israel-i Gaza Strip nung Palestine nunger nisung 46 tepset

Deir al-Balah, Chiteni/July 30 (Agencies): Israel-i Mongulbar aonung nungi Bodhbar anepdang tashi Gaza Strip tesem balala amakba nung Palestine nunger nisung 46 tepset, aser parnok ya timba chiyongtsü bushiba telok tem nungi lir, ta yangji aliba mozüki nungi osang ajanga ashir.

Asürtem rongnung nisung 30 dak tema humanitarian aid bushia aliba mapang tepsetba lir, ta ashir.

Israel mitkari amakba indang shia mali, saka parnoki telungpur dak dang tenük yoker ta ashir aser civilian asüba atema Hamas tenüng asener, kechiaser par telok indang militants tem nisung aika aliba tesem nung alir.

Israel-Hamas rara nung Israel-i ceasefire alitsü memulungra September ita Palestine nunger linük ka agizüchtsü ta United Kingdom-i sangdonger lia iba tasüba osang ya angashir. Kasaji France tiria Gaza Strip ya Palestine nunger linük ta sangdongtsü shia lir. Israel indang foreign ministry ajanga British sangdong magizüker ta shiogo.

Gaza City nung aliba Shifa hospital ajanga ashiba agi, Gaza northwest tsütsü Zikim crossing nungi teyari oset bena aliba gari aruba ataa alidak Israel sepaitemi Mongulbar aonung injang khalokja nisung 12 tepsetba par mozükidangi bener aru ta ashi.

Jabaliya refugee camp aser north tsütsü Beit Lahiya aser Beit Hanoun jila tem nunga nisung 13 tepset, ta mozüki ajanga ashi.

South len Khan Younis yimti nung Nasser mozükidangi nisung tasü mang 16 bener aru, shirnok Mongulbar nikongdang tang tasen yanglua aliba Morag corridor nungi aid trucks aruba ataa lia tepset, ta iba mozüki osang ajanga ashi. Morag corridor yagi Khan Younis aser south tsütsü tatembangba Rafah yimti sadangtsür.

Khan Younis nung süki ka nung amakba mapang tepsetba tebur ka tasü mang mozü kidangi bener aru ta parnoki ashi.

Urban Nuseirat refugee camp nung aliba Awda mozüki ajanga ashiba agi, Wadi Gaza south tsütsü Netzarim corridor area nung Gaza Himanitarian

Goundation (GHF) ajanga lapoka aliba aid distribution site ka anasa Israel-i Bodhbarnü injang khaloktsüba mapang tepsetba Palestine nunger tasü mang pezü agizüikogo.

Kasa mapang Gaza Strip nung tesüiba ghonda 24 tsüngta achi-ajemtsü peria maliba dak sendakba nung tanur ka densema Palestine nunger nisung tenet asü, ta iba territory indang health ministry ajanga Bodhbarnü ashi. Gaza nung iba rara tenzüker tepok masüng asüba tanur 89 alitsü. June ita tatemlen nungi taintem yasa-tzüra agi asüba azüng tenzüker tang tashinung Gaza nung Palestine nunger nisung tain 65 yasa-tzüra agi süogo, ta ministry ajanga ashir.

Hamas-i anir telungpur temi October 7, 2023 nü Israel south tsütsü maka nisung 1,200 shi tepseter ano nisung 251 pua bener aoba ajanga rara ya tenzüik. Tayang kepzüka Israel-i Gaza Strip tesem ajunga mokdanga yur amakba nung Palestine nunger nisung 60,000 dak tema tepsetogo, ta Gaza indang Health Ministry ajanga ashir.

MLA Kevipodi -i KDFA jersey sayatsüogo



Kohima, Chiteni/July 30 (TYO): MLA aser Dr. T. Ao Trophy 24th Inter-District Football Championship 2025 Organising Committee Convener Kevipodi Sophie-i Bodhbarnü IG stadium nung Kohima District Football Association (KDFA) indang jersey sayatsüogo.

Sentong nung o jembiba mapang Sophie-i asayartem dang temaba jenjang atongtsü atema merangtsü aser Kohima district nem konang tetushi bener arutsütsü ajungshia liasü. Paisa, asayaba moapu nung takok tashi pei akokba yari meranga asayatsü ajungshiba den iba

asayamung nung takok tajung angutsü imlaja ataba lemsatepa liasü.

KDFA indang jersey tasenba ya Sophie-i, MLA & Co-Convener Dr. Tseilhoutuo Rhutso, Kohima Deputy Commissioner B. Henok Buchem, Superintendent of Police Kohima Teisovise Metha, Nagaland Football Association (NFA) tir Neibou K Sekhose, organising committee züngsemtem, KDFA ketdangsürtem aser asayartem matsüngdang sayaja liasü. Jersey sayaba sentong ya KDFA executive züngsem Pudil Tsükrü-i sarasademer tenzüka liasü.

Dr T Ao Trophy ya Dr Talimeren Ao nüngdem nung ayongzüka asayaba asayamung ka lir. Pa ya Naga nung rongnungi nüngtugu football asayar ka aser Olympics nung mezüngbuba India football team captain liasü. Iba asayamung ya Nagaland nung ajak dang tongtibangtiba inter-district football asayamung lir.

Taküm iba asayamung ya August 1 nungi 15 tashi NFA-i ayongzüka asayatsü. Asayamung ya KDFA-i host asütsü aser District planning and Development Board, Kohima-i teyari agüja IG stadium Kohima nung asayatsü.

Ben Stokes India den Test 5buba masayatsü

Chiteni/July 30, 2025 (Agencies): England cricket captain Ben Stokes biceps tendon yiruba ajanga India den Oval nung Test pongububa aser tatembangbuba nung masayatetsü. Iba asaya atema England team nung asayar pezü melenogo.

England selection panel-i Bodhbarnü team nung asayartem melenshiba sangdongogo, kong Jacob Bethell, Gus Atkinson, Jamie Overton, aser Josh Tongue nung densema lir. Stoke masayaba mapang captain mapa ya Ollie Pope nem agütsüogo aser pa lenisüba nung Test pongububa ya asayatsü.

"Hau ni tezü adanger. Ni tapu tachichilen yirur lir. Tajangzük aser takoksa asadanga sülen takoksa tuluba asütsü ta odangteta liasü. Ni temang anepalu tenzüksü aser asükwa asayamung dak rangloker inyaksü," ta Stokes ashi

"Ni kecha minyaktetsü. Professional asayar ka ama yiruba ya asaya nung shilem ka lir aser iba atema ni kecha

mesütetsü," ta pai shisem.

Manchester Test nung tatembabuba anogo Stokes-i over 11 aon, saka pa kanga timtema liasü, aser iba sülen pa teka tachichilen biceps tendon yiruba metetdakja liasü.

Test tembangba sülen pa Oval nung asayatsü ta ashi, saka pa kanga mejungi yirugo aser ibayongji team nung mezüngoksem.

Pa masayatetba ya England team atema takoksa tulu asütsü. Stokes ya iba asayamung nung wicket timtiba agiba asayar lir aser Manchester nung asayaba mapang pai küm ana tsüngda mezüngbuba century yanglu, aser taoba asaya ana nung pa nem Player of the Match naroküm agüja liasü. Pa tang yiruba ya tezüdangtsüka lir, kechiyong pa taoba küm anaben tashi hamstring yiru aser tang yiruba ajanga taruba Ashes nung asayatetsü masayatetsü mejangjai kümdaktsür.

Stokes' melena team nung Bethell züngoksemogo aser iba tetezü England team nung pa spin bowler tongtiba

asütsü. Ajisüaka Test pongububa ya seamer tem tsüngda tetoktepba ka asütsü imlar.

Team management-i lineup melenshitsüogo, aser spinner Liam Dawson aser pace bowler Jofra Archer aser Brydon Carse nung team nung züngoksema mali. Surrey bowler Gus Atkinson aser Jamie Overton na pace attack akangshitsü atema shimogo.

Jacob Bethell ya number six ama asayatsü aser iba ajanga England indang middle order akangshitsütsü. Team nung wicket keeper Jamie Smith asütsü.

Batting order nung Zak Crawley aser Ben Duckett na maneni opener asütsü aser tena sülen Pope number asem aser Joe Root pezübuba nung asayatsü imlar.

Test pongububa atema England team:

Zak Crawley, Ben Duckett, Ollie Pope (captain), Joe Root, Harry Brook, Jacob Bethell, Jamie Smith (wicketkeeper), Chris Woakes, Gus Atkinson, Jamie Overton, aser Josh Tongue.

Macau Open: Ayush quarter-i, Dhruv-Tanisha round 16-i iogo

Chiteni/July 30, 2025 (Agencies): Bodhbarnü Macau Open BWF Super 300 asayamung tebur kija asaya nung India nung asayar Ayush Shetty-i Huang Yu Kai madak takok ngua quarterfinal-i iogo.

Kasa asayamung nungsa tarep temeyoktep asayar Dhruv Kapila aser Tanisha Crasto nata Ratchapol Makkasasithorn aser Nattamon Laisuan na akokba sülen Round of 16 tongtetogo.

Shetty aser Chinese Taipei nung asayar Huang na asaya ya Shetty-i ghonda tesadang ka nung dang 21-10, 21-11 agi straight sets nung koka liasü.

Kasa mapang nung Kapila aser Crasto nati Thailand nung tarep Makkasasithorn aser Laisuan na 21-10, 21-15 agi ayong ayonga koka liasü.

Tarep ana tsüngda asaya minute 26 asaya liasü.

Round of 16 nung Kapila aser Crasto na Malaysia nung tarep Lai Pei Jing aser Wong J na den asayatsü aser Shetty Justin Hoh den asayatsü.

Ajisüaka India nung rongnungi tebur kija asaya nung Sathish Kumar Karunakaran bo Malaysia nung asayar Justin Hoh-i t s ü k d a k t s ü o g o . Karunakaran-i iba pre-quarterfinals asaya ya 19-21, 12-21 agi mekoki liasü.

India nung asayartem rongnungisa tarep temeyoktep asayar Rohan Kapoor aser Ruthvika Shivani Gadde nati kanga meranga asaya saka Chinese Taipei nung tarep Wu Guan Xun aser Lee Chia Hsin na 20-22, 17-21 mekoki tsükogo.

CAFA NATIONS CUP

India team Group B nung ata lir

Chiteni/July 30, 2025 (Agencies): CAFA Nations Cup 2025 nung India team Group B nung Tajikistan, Islamic Republic of Iran aser Afghanistan den ata lir.

Iba Central Asian regional asayamung nung India team mezüngbuba asaya hosts Tajikistan den Dushanbe nung August 29 nü asayatsü aser iba sülen September 1 nü Iran aser September 4 nü Afghanistan den asayatsü.

Asayamung ya August 31 nungi September 8 tashi asayatsü aser iba asayamung ya India team atema AFC Asian Cup 2027 Qualifiers tatembangbuba round asoshi renemshiba asayamung tongtibang ka asütsü.

India team asoshi taruba group asaya ana ya temaba jenjang nung aliba team tem

den asütsü. Telok anaprongla nungi temaba jenjang nung tembangba team ana September 8 nü play-offs asayatsü. Group nungi takok anguba team Tashkent nung final asayatsü aser tanabuba jenjang nung tembangba team ana Dushanbe nung tasembuba jenjang atema asayatsü.

Tashkent nung asayatsü aliba Group A nung hosts Uzbekistan, Kyrgyz Republic, Turkmenistan, aser asayamung atema jaokba Oman team densema lir.

Linük ti asayaba asayamung nung India aser Oman na ya asayamung atema jaokba team lir. Iba asayamung ya tatemsa 2023 küm asayaogo aser iba küm final nung Iran-i goal 1-0 agi Uzbekistan koka parnok defending champion lir.

CAFA Nations Cup 2025 Draw:

Group A (Tashkent):

Uzbekistan (H), Kyrgyz Republic, Turkmenistan, Oman

Group B (Dushanbe):

Tajikistan (H), IR Iran, Afghanistan, India

India indang fixtures:

Aug 29: vs Tajikistan

Sep 1: vs IR Iran

Sep 4: vs Afghanistan.

BILEMDANGANG

"Tajangshiba tajung tamajung ajak terenlok atema tongtibang."